

V E N D I M
Nr.326, datë 21.6.1993

**PËR KRITERET E TRAJTIMIT TË INVALIDËVE TË LUFTËS KUNDËR
PUSHTUESVE NAZIFASHISTË TË POPULLIT SHQIPTAR**

(Ndryshuar me VKM nr. 186, datë 21.4.2000; nr. 332, datë 29.5.2003)

(i përditësuar)

Në zbatim të ligjit nr.7663, datë 20.1.1993 "Për statusin e invalidit të luftës kundër pushtuesve nazifashistë të popullit shqiptar", me propozimin e Minsitrisë së Drejtësisë, Këshilli i Ministrave

V E N D O S I:

1. Personit i lind e drejta të njihet si invalid i luftës, kur paraqet këto dokumente:
 - a) Librezën e pensionit të invalidit të luftës ose të pensionit të pleqërisë, kur në të është llogaritur edhe shtesa si invalid i luftës.
 - b) Vërtetimet zyrtare të lëshuara nga Ministria e Mbrojtjes, Ministria e Rendit Publik, degët ushtarakë, Drejtoria e Përgjithshme e Arkivave të Shtetit e spitalit ushtarak, si dhe çdo akt tjetër zyrtar që vërteton plagosjen a gjymtimin në kushtet e parashikuara në nenin 1 të ligjit nr.7663, datë 20.1.1993.
 - c) Kur nuk ka dokumente zyrtare, plagosja a gjymtimi në luftën kundër pushtuesve nazifashistë të popullit shqiptar vërtetohet në rrugë gjyqësore, sipas dispozitave në fuqi.
2. Qenia invalid, grupi përkatës dhe ndryshimi i grupit të invaliditetit përcaktohen nga Komisioni mjekësor i caktimit të aftësive për punë, mbi bazën e kërkesës së të interesuarit ose të degëve të sigurimeve shoqërore, sipas kriterëve të ligjit "Për sigurimet shoqërore në Republikën e Shqipërisë".
3. Invalidit të luftës i jepet një shtesë mujore mbi pensionin e invaliditetit në masën:

- Për grupin e parë të invaliditetit	4000 lekë
- Për grupin e dytë të invaliditetit	3500 lekë
- Për grupin e tretë të invaliditetit	3000 lekë
- Për grupin e katërt të invaliditetit	2500 lekë

Këtë shtesë invalidi i luftës e merr edhe kur përfiton pension pleqërie. Kjo shtesë do t'u nënshtrohet të gjitha rritjeve që kanë pësuar dhe do të pësojnë pensionet për shkak të rritjes e të ndryshimit të çmimeve, duke filluar nga data 20 janar 1993.

4. Personi i ngarkuar sipas vendimit të KMCAP-së për t'i shërbyer invalidit të luftës të grupit të parë merr pagën bazë të caktuar në klasën II të lidhjes nr.II të vendimit të Këshillit të Ministrave nr.393, datë 3.9.1992 (pa përfutur shtesat e tjera), që paguhet nga bashkitë ose komunat.

5. Invalidët e luftës gëzojnë të drejtën e kurimit falas në spitalet, klinikat dentare dhe qendrat e kurimit, që financohen nga shteti, si dhe përfitojnë falas të gjitha barnat, sipas recetës së mjekut.

5/a. Invalidët e luftës me gjymtime të rënda, në pamundësi të kurimit brenda vendit, të diagnostikohen e kurohen jashtë shtetit, sipas vendimit të komisionit ndërspitalor, që funksionon pranë Qendrës Spitalore Universitare "Nënë Tereza" Tiranë.

5/b. Invalidët e luftës të pajisen falas nga Ministria e Shëndetësisë me mjete ortopedike, proteza dhe mjete lëvizëse, të përshtatshme për ta.

5/c. Udhëtimi i invalidëve të luftës me mjetet e transportit qytetës, publik bëhet falas,

ndërsa me mjetet e transportit ndërqytetës të bëhet duke paguar gjysmën e vlerës së biletës, kundrejt paraqitjes së dëshmisë së invalidit. Për rastet kur këto transporte janë private organet përkatëse, në kontratat me subjektet private, parashikojnë efektet që rrjedhin nga zbatimi i kësaj pike.

5/ç. Kur invalidi i luftës vdes, komuna ose bashkia i bën nderimet përkatëse dhe përballon shpenzimet e varrimit, duke i dhënë familjes së të ndjerit 150 000 (njëqind e pesëdhjetë mijë) lekë. Në shpenzimet e varrimit përfshihen arkivoli, transporti, qëndrimi në morg, ceremonia dhe dreka.

5/d. Organet e qeverisjes vendore trajtojnë me strehim, me përparësi, familjet e konsideruara të pastreha, që në çastin e hyrjes në fuqi të ligjit nr.8647, datë 24.7.2000 "Për disa shtesa në ligjin nr.8030, datë 15.11.1995 "Për kontributin e shtetit për familjet e pastreha"" kanë në përbërje të tyre invalid, të Luftës Antifashiste Nacionalçlirimtare.

6. Shoqata e invalidëve të luftës për vitin 1993 të financohet me 400 mijë lekë nga fondi rezervë i Këshillit të Ministrave në Buxhetin e Shtetit për vitin 1993.

7. Dëshmia e invaliditetit lëshohet nga kryesia e shoqatës dhe seksioni i financës i vendbanimit të invalidit. Ajo përmban gjeneralitetet e invalidit, fotografinë e tij dhe të drejtat që ai gëzon të përcaktuara në ligj. Kur invalidi vdes, dëshmia e tij i dorëzohet organit drejtues të shoqatës.

7/a Departamenti i veteranëve e invalidëve të Luftës Antifashiste Nacionalçlirimtare dhe dëshmorëve të atdheut, në Ministrinë e Mbrojtjes, ndjek zbatimin e politikave të qeverisë për përkujdesjen ndaj invalidëve të luftës, sipas të drejtave dhe detyrimeve, që rrjedhin nga aktet ligjore e nënligjore në fuqi.

7/b Deklarimi invalid lufte nga Komisioni i Ekspertizës Mjekoligjore dhe përcaktimi në grupin përkatës konsiderohen të mbyllura.

8. Ngarkohen Ministria e Mbrojtjes, Ministria e Financave, Ministria e Shëndetësisë, Ministria e Transportit dhe e Telekomunikacionit, Ministria e Punës dhe Çështjeve Sociale, Ministria e Pushtetit Vendor dhe e Decentralizimit, Ministria e Rregullimit të Territorit dhe e Turizmit, Instituti i Sigurimeve Shoqërore dhe Instituti i Sigurimeve të Kujdesit Shëndetësor për zbatimin e këtij vendimi.

9. Institutit të Sigurimeve Shoqërore për vitin 1993 i shtohen 13 milionë lekë, që përballohen nga fondi rezervë i Këshillit të Ministrave në Buxhetin e Shtetit për vitin 1993.

10. Ky vendim hyn në fuqi menjëherë dhe i shtrin efektet e tij që nga data e hyrjes në fuqi të ligjit nr.7663, datë 20.1.1993 "Për statusin e invalidit të luftës kundër pushtuesve nazifashistë të popullit shqiptar".

KRYETARI I KËSHILLIT TË MINISTRAVE
Aleksandër Meksi